

四庫全書

史部

欽定四庫全書

史部
禮部志稿卷六十五

評校官監察御史_臣龔驥文

編修_臣程嘉謨覆勘

總校官知縣_臣楊懋珩

校對官學正_臣翁樹崇

謄錄監生_臣王秉鈞

欽定四庫全書

禮部志稿卷六十五

明 俞汝楫 編

頒令備考

傳制

傳制儀

凡大祀前三日陳設如常儀文武官各具朝服詣丹墀
拜位鐘聲止儀禮司跪奏請陞殿樂作皇帝御華蓋殿

具皮弁服出陞座樂止鳴鞭訖贊四拜傳制官詣御前
跪傳制由東門出至傳制位稱有制贊跪宣制云洪武
某年正月某日大祀天地於南郊爾文武百官自某日
為始致齋三日當敬慎之傳訖贊俯伏興樂作又四拜
平身樂止奏禮畢

凡遣官祭祀前一日陳設如常儀次日各官具服於丹
墀北向立皇帝御華蓋殿具皮弁服鐘聲止執事官行
一拜三叩頭禮訖儀禮司跪奏請陞殿樂作陞座樂止

捲簾鳴鞭訖唱排班班齊百官一拜叩頭畢分東西立
引禮引獻官詣拜位贊四拜平身傳制官詣御前跪奏
傳制俯伏興由東門靠東出至丹陛東西向立稱有制
唱跪宣制

祭孔子則曰某年月日祭先師孔子大成
至聖文宣王祭帝王則曰先聖歷代帝王命

卿行禮贊俯伏興樂作四拜樂止禮畢

凡傳制遣官代祀歷代帝王并旗纛孔子等廟前一日
沐浴更衣處於齋宮次日還宮

洪武二十九年凡傳制遣使持節俱由東階左行

傳制樂

與朝賀同

樂章典祀之曲氤氲滿殿香八音絲竹弄笙簧金石音
韻彰匏土革木度鏗鏘高捧降明香吾皇誠念詣神方
不佞禍淫福善理之常

頒詔

頒詔諸蕃皇帝服通天冠絳紗袍出御奉天殿樂作陞
座禮部官捧詔書於寶案前用寶中書省官禮部官同
捧至御前呈奏以黃金袱裹置盤中置於案引禮導使

者就丹墀拜位典儀贊拜樂作使者四拜興樂止承制
官由中門出至丹陛上曰有制使者跪承制官宣制曰
皇帝勅使爾某奉詔往諭某國爾宜恭承朕命宣制訖
使者俯伏興樂作四拜樂止禮部官詣案捧詔降自中
陛以授使者大樂振作使者捧詔至午門外置龍亭中
侍儀奏禮畢皇帝還宮各司正官一員送詔書出國門
外其賜蕃國印綬則曰皇帝勅使爾某國王印爾其恭
承朕命如有賜物則併宣之

湔除

頒行湔除詔

每年十二月二十五日欽奉勅書一道湔除在京及南京見在任文武羣臣除贓罪外自本年十二月日以前所犯罪名紀錄在官者悉與湔除除謫黃通行外將原奉勅書次日面繳如遇免朝止將勅書隨本繳進本日黎明本部堂上官并儀制司官會同三法司官俱到左順門候司禮監官到各官行一拜三叩頭禮跪翰林官

以勅立授禮部官各官復叩頭禮畢禮部官以勅付儀制司郎中前行各官隨後由午門左門出俱到本部設香案於露臺上各官望闕行一拜三叩頭禮至川堂開勅謄黃頒行各衙門

勅湔除

成化元年勅禮部三法司曰新正在邇萬物咸亨在京文武羣臣除贓罪外自天順八年十二月二十五日以前所犯罪名紀錄在官者悉與湔除俾圖自新仍命有

司行文於天下諸司

纂修備考

纂修官例

修實錄官

太祖實錄永樂初命曹國公李景隆監修戶部尚書夏
原吉學士解縉禮部尚書李至剛總裁再命原吉及太
子少師姚廣孝監修學士胡廣楊榮總裁太宗仁宗實錄
英國公張輔少師蹇義少保夏原吉監修少傅楊士奇

太子少傅楊榮太子少保金幼孜總裁太常卿楊溥為
副總裁大學士陳山張瑛續總裁宣宗實錄英國公張
輔監修少傅楊士奇楊榮尚書楊溥總裁少詹事王直
王英為副總裁英宗實錄會昌侯孫繼宗監修少保李
賢尚書陳文彭時總裁少卿劉定之吳節為副總裁憲
宗實錄英國公張懋監修少傅劉吉尚書徐溥侍郎劉
健總裁尚書邱濬少詹事汪諧為副總裁孝宗實錄初
命少師劉健李東陽少傅謝遷總裁吏部侍郎張元禎

詹事楊廷和學士劉忠為副再命東陽少傅焦芳王鏊
少保楊廷和總裁尚書梁儲為副而監修則仍公懋武
宗實錄則定國公徐光祚監修少師楊廷和少傅蔣冕
毛紀少保費宏總裁後廷和冕紀皆去申命宏及少師
楊一清少保石瑄賈詠而尚書毛澄侍郎羅欽順為副
後增侍郎吳一鵬獻皇帝實錄定國公徐光祚尚書席
書監修少師費宏楊一清太保石瑄尚書賈詠總裁

嘉靖實錄官

隆慶元年勅諭太師兼太子太師成國公等曰茲者恭
修皇考世宗肅皇帝實錄已勅禮部采取事績命爾希
忠為監修官大學士階春芳朴以勤居正為總裁官禮
部尚書兼翰林院學士高儀為副總裁左春坊左諭德
兼翰林院侍讀姜金和等為纂修官於元年六月初一
日開館朕惟我皇考臨御天下四十有五年功德巍巍
如天之大固未易以名言然其政令賞罰之施制作文
章之盛言為典謨動成規範其事布之天下其文具在

有司可得而稱述茲命爾等稽古義例纂緝成編以佑後人貽萬世其一時吏職之稱否臣下之媿惡亦得附見以垂鑒戒爾等宜悉心綜理夙夜勤事毋忽以致遺母諱以失實毋偏以廢公毋怠以玩歲殫乃心力用昭一代之令典以覲揚我皇考之耿光稱朕意焉欽哉

隆慶實錄官

萬厯元年勅諭太師兼太子太師成國公等曰朕惟帝王繼世而興繼承大業莫不有功德之實敷布天下亦

莫不有紀載之書垂示於後世典謨傳紀班班可考祖
宗列聖代有實錄藏之天府洪惟我皇考穆宗莊皇帝
淵毅夙成寬仁內植動符天心德洽民心北狄南夷款
關獻馘外寧內戢遠至邇安雖臨御僅六載而功烈邁
軼百王非有紀述不足以彰盛美而播休光爾禮部其
遵祖宗故事通行諸司采輯事實送翰林院纂修實錄
其以太師兼太子太師成國公朱希忠為監修少師兼
太子太師吏部尚書建極殿大學士張居正太子少保

禮部尚書兼武英殿大學士呂調陽為總裁禮部尚書
兼翰林院學士陸樹聲吏部右侍郎兼翰林院侍讀學
士諸大綬禮部左侍郎兼翰林院侍讀學士王希烈詹
事府掌府事禮部左侍郎兼翰林院侍讀學士馬自強
禮部右侍郎兼翰林院侍讀學士陶大臨太常寺卿兼
翰林院侍讀學士掌院事丁士美左春坊左諭德兼翰
林院侍讀申時行右春坊右諭德兼翰林院侍讀王錫
爵為副總裁右春坊右諭德兼翰林院侍讀余有丁等

為纂修官一應合行事宜悉照例舉行欽哉故諭

謹按永樂中詔重修高廟實錄布衣陳濟與學士解縉等為總裁而禮部尚書李至剛及講讀以下僅為纂修官

又按國朝修實錄例以內閣大臣總裁而元勳上公一人監修獨高廟實錄初以曹國公李景隆監修戶部尚書夏原吉副之後睿宗實錄復用禮部尚書席公書吏部尚書廖公紀益特典也

又按勲臣三世各再監修國史者英國公張輔子懋
曾孫溶文臣再監修國史者夏原吉再總裁國史者
三楊劉健張居正

纂修事例

遣官詣郡縣求志

永樂十六年六月乙酉詔纂修天下郡縣志書命行在
戶部尚書夏原吉翰林院學士兼右春坊右庶子楊榮
翰林院學士兼右春坊右諭德金幼孜總之仍命禮部

遣官徧詣郡縣博採事蹟及舊志書

慎重修牒

正德元年大學士劉健等言玉牒所以紀載宗支乃朝廷重事也今又及十年續修之期乞勅宗人府禮部查照所收文案明白送院續修但宗支日繁所司開送名爵謚號嫡庶行次婚配生卒年月類多闕漏不詳或相牴牾雖參互考訂終恐不得其真謂宜定著其式移文各王府長史司子女已未請名受封婚嫁薨故之類如

式造冊奏繳務令考據詳審謄寫真正如有苟簡錯誤及視常怠玩者所司參究庶幾無誤修葺從之

更定進玉牒儀

正德元年故事進玉牒於文華殿行禮如常儀太常寺少卿兼侍讀學士楊時暢以為玉牒所載甚重宜於奉天殿進呈庶盡尊祖敬宗之義上命內閣大學士劉健等與禮部議從其言乃更定儀註行之

玉牒事宜圖說

嘉靖二十四年九月初一日內閣題玉牒事宜禮部尚書嚴嵩等為照玉牒紀載宗支以垂萬世係朝廷重事其制不敢不倍加詳慎其舊牒內有事當釐改者理合開具上請臣等看得第一冊內例有總圖備載天潢世系於首所以表帝王之統合同氣之親也切因世代未遠人數未多有紙一面列書代氏而以硃線各係所出之子孫於下但近年以來宗派蕃衍已倍於前其數不

下累萬茲仍用前制不惟紙狹不足備載而字跡微眇
硃線紛亂難以尋檢不無遺漏混淆之弊况將來天支
萬代愈難增續臣等竊意略倣古史世表之法以橫格
分代數而列書其名氏於上其各派所出子孫則從而
通書於各派之下庶世次不紊一覽可見仍餘下方以
俟後來增入臣等又思得玉牒之脩當以帝系爲宗統
其中雖有係長出但不有天命位在藩封如懿文太子
秦晉二王不敢以加於成祖之前又有雖係長出但既

殤而追受封號如悼恭太子岳懷王哀沖太子雖當以冊內載之不敢列於圖之前俱所以尊帝統也其無所妨如潁陽等王則仍書之又壽春王熙祖之長子仁祖之兄也南昌諸王仁祖之長子太祖之兄也俱在太祖有天下之後追封為王今靖江王則南昌王之後也以太祖之聖子神孫視之則有堂從之分舊圖以列於帝系之前今移置本支之後亦所以尊帝統也以上諸事皆因舊圖而少加釐改謹著為帝王世系總表一冊上

進奉御批畢不可先尊亡不可先存着照今擬用

令提學官採輯

隆慶元年禮部奏纂修世宗實錄事蹟令各省提學官採輯編彙賁送史館免差官採訪從之

纂修恩例

定實錄賞格

永樂元年上以太祖皇帝實錄將成命禮部預定賞格尚書李至剛以修元史賞例進上覽之曰此述前代興

亡之跡今朕紀皇考神功聖德貽範萬世豈可比而同
之爾擬議非倫矣遂親定監修官銀百兩綵幣六表裏
織金紗衣一襲鞍馬一副纂修官各銀五十兩綵幣四
表裏紗衣一襲催纂兼謄寫官銀三十兩綵幣二表裏
紗衣一襲催纂官銀二十五兩綵幣二表裏紗衣一襲
謄寫監生生員儒士各銀十兩鈔三十錠綵幣一表裏
謄寫吏各銀八兩鈔三十錠綵幣一表裏催督謄寫者
鈔二十錠絹二疋辦事吏各鈔二十錠絹一疋

謹按錄成監修官總裁官以下與纂修官例有白金綵幣或羅衣鞍馬之賜此外有催纂官謄寫官催督官收掌文籍官賞賚有差在局謄寫監生生員儒士謄寫吏典辦事吏典各色人匠皆及之

又按錄成之後例有遷官其監修總裁加秩則始自正統五年前固無之

又纂修官事故去任及監生事故去久近不一陞擢賞賚有差

議事備考

會議

覆奏會議事理

弘治二年刑科給事中胡金言我祖宗成憲或會舉官員或會問刑獄或會議政事此固良法美意然而所會舉之人所會問之形容有未能悉當者姑以會議一事言之陛下即位以來用賢納善出於天性故凡內外臣工交章累疏莫不欲罄一得之愚圖報萬一言雖未當

亦蒙優納中間或有勅多官會議者然章下該部必緩至數旬積至數章累至數事然後報於該議者至臨議之際誦者不過槩論大畧聽者或不能周知其詳疏條浩繁坐起疲倦類多遷就莫可致詰或云此見行條例或云此泛言難准甚至以人微而棄其言以勢重而附其說謂之會議而乃至於如此豈不有孤陛下采納之盛心哉乞勅該部此後凡會議章疏須預令會議衙門俱得遍閱事由無拘章疏多寡俱在五日内會議從容

論辨各盡所長何者為可行何者為未當不以人廢言
不以言徇勢庶所采者公論而所行者良法下禮部覆
奏以為會議舊有成規有半年一議者有半月一議者
亦有五日内即議者大要酌事勢緩急而為次第也有
會一二衙門議者有兼會公侯伯都督并翰林院詹事
府國子監十三道御史議者亦因事勢輕重而欲各伸
所見也況今天下之廣建言者無日無之而諸司政務
日不暇給若不拘章疏多寡事理巨細俱於五日内議

得無講說太煩有妨政務乎上曰今後有要務關民情者半月內議之若利弊諸事果應急議者限五日議聞

會議先傳告節畧

正德六年八月監察御史江萬實言朝廷凡大事必令會官議擬正欲合衆論之公以求事理之當然非素有一定之見豈能決擇於立談之間况竊聽於旁者每如堵牆機密重務不免傳泄自今凡有會議先具揭帖送與議者至期乃議若事急者本日將議之先亦宜傳告

節畧仍禁諸人不得竊聽庶盡羣見而機事亦密禮部
議從之

會議建言

凡天下官吏軍民人等建言民情每歲本部議定可否
俱赴御前奏過其間可行者移咨該衙門施行若泛言
不切立案不行至於天下巡撫官各陳地方利弊則從
各部會議具奏定奪

凡朝廷有大事當會議者該部奏請各部都察院通政

司大理寺堂上官或掌科掌道官若合會武臣則五府管事官皆預合會儒臣則翰林院詹事春坊司經局及國子監皆預

嘉靖三十一年十一月內該本部題為申明會議建言事查得大明會典內一款凡天下官吏軍民人等建言民情每歲本部會官議定可否俱赴御前奏過其間可行者移咨該衙門施行若泛言不切立案不行又一款洪武二十四年令在京衙門奉旨為格為例及重事須

會多官計議然後施行又一款景泰四年令建言者該衙門詳細參看果有利國利民可行則行有假以言事報復讐怨者具奏治罪欽此參詳例意前後互發凡事體重大及應該議擬裁斷著為格例施行者然後多官集議凡建言民情亦須各衙門參詳應該會議之事然後本部會官定議非不論小事一該會議及未經各衙門詳看而輒會議也近來各處建言有稱撫按見行要得久遠遵守者則不待議有須行撫按勘報及知的確

者則不能遽議有累經題奏欽依著之令甲難以變更者則不當復議若緊行會議似涉泛濫與先後例意不合又照洪武年間有直陳得失無事繁文之式永樂年間有薦越合干上司徑赴朝廷干冒之禁合無今後凡有建言民情本部即行各該衙門參詳撫按查勘不能遽議者徑行勘覈累經題著令格不當更改或中間稍有損益者徑自題覆違式違禁挾讐報怨者徑參治罪其事體重大應詎議擬裁為格例而一向未經題定或

雖曾題定而時異勢殊應得更革者然後回報本部年終會議取自上裁其各該衙門參詳過徑行徑題徑參等項事件亦隨報本部年終具節畧開坐題知庶幾會議不濫事體可久等因奉聖旨是欽此

會議應與官

正統十年五月禮部言天下諸司官吏軍民建言例會廷臣議行竊見宣德中尚書蹇義夏原吉已解職務特詔與議正統初學士楊士奇楊榮楊溥輪番會議今士

奇榮已故惟溥尚在請學士陳循曾鼎馬愉參之上以溥老禮宜優間令循等與議

建言

禁建言假公營私

永樂元年癸丑禮部尚書李至剛上言以為論道經邦必求賢才興利除害必開言路昔太祖高皇帝勵精圖治聽納無遺三十年間化行俗美皇上即位以來恭遵成憲廣開言路博采羣謀凡有可行無不聽納然無知

小人往往假此為名或搜求細事拊制諸司或懷挾私
讐陷害良善或妄稱奏疏躲避差徭或馳騁小才希求
進用甚者無稽泛言煩瀆聖聽雖稱興利除害其實假
公營私誠宜榜示天下果有益國便民之事雖百工技
藝之人皆許具實陳奏若官吏人等貪污顛倒曲直酷
虐良善及婚姻田土軍民役等事必令自下而上陳告
若有假以實封建言薦越上司往赴朝廷干冒者治以
重罪上可之

寬宥建言得罪

正統元年直隸六安州英山縣知縣賀完言書曰嘉言罔攸伏萬邦咸寧切見各處官吏人等先有上書陳言者本為開張治道及軍民利病一時詞語鯁直犯冒天威遷降遠方及發充軍為民以此人多畏罪保祿不肯進言乞取回量才擢用或仍復舊職庶使下情得以上達上命行在禮部議行

參詳建言

嘉靖三十三年禮部覆通政司議自今凡建言民情本部即行各衙門參詳撫按見行小民稱便者徑行查照遵守應該撫按查勘不能遽議者徑行勘覈累經題著令格不當更改或中間稍有損益者徑自題覆違式違禁挾仇報怨者徑參治罪其事體重大應該議擬裁為格例而一向未經題定而時異勢殊應議更革者回報本部歲終會議取自上裁其徑行徑覆徑參者亦報部歲終開具節畧奏聞報可

旌表備考

旌表總例

旌表節孝

諸司職掌本部據各處申來孝子順孫義夫節婦理當
旌表之人直隸府州咨都察院差委監察御史覈實各
布政司所屬從按察司覈實着落州府縣官同里甲親
隣保勘相同然後明白奏聞旌表

大明令凡民間寡婦三十以前夫亡守志五十以後不

改節者旌表門閭除免本家差役

大明會典洪武間詔申明孝道凡割股或致傷生卧冰或致凍死自古不稱為孝若為旌表恐其倣效通行禁約不許旌表

嘉靖二年奏准今後天下文武衙門凡文職除進士舉人係貢舉賢能已經豎坊表宅及婦人已受勅詔封為命婦者仍照前例不准旌表外其餘生員吏典一應人等中間孝子順孫義夫節婦志行卓異足以激勵風化

表正鄉閭者官司仍具實跡以聞一體旌表又奏准今後節婦但係風憲官覈實本部雖有病故者亦奏准類奏旌表

嘉靖四年二月內禮部題為旌表事查得節年卷內凡節婦諡有司具奏到部行勘覈實案候類奏旌表間有覈實到部者或病故不與旌表緣查節婦必須年三十以下守節至五十以上者志行已定方許有司具奏但中間行勘竝風憲官覈實往返經年加之官吏里胥刁

證又不可以歲月計也所以一經行勘之後回文未及
到部遂致抱節而死者容或有之此其平生志行堅定
不獲表彰良可矜恤况奉明詔訪求特加旌表無非激
勸風俗之盛典也合無今後節婦但係風憲官覈實到
部者雖已病故應同見在亦准類奏旌表等因題奉欽
依准議行欽此除欽遵外伏覩嘉靖三年四月十九日
貞烈詔書內一款孝子順孫義夫節婦有司開具實
跡奏聞以憑旌表不許里書人等指勒刁難致令無由

上達若守節年久果有貞烈實跡例該旌表而身故者一體奏聞舉行欽此欽遵今照各處有司援此將遠年已故孝子節婦一槩具奏乞要旌表今若不拘久近則自洪武永樂年間已故孝子節婦皆來奏擾有礙舊例相應再為酌處覆奉欽依今後除正德十六年以前身故者為舊例所拘仍舊不准旌表其嘉靖元年以後民間果有孝子順孫義夫節婦未經有司具奏病故者遵照詔書內事理許其一體奏聞舉行照例旌表

嘉靖十年十月內禮部題為旌表節孝事查得本部節
年稿簿內開凡民間孝子順孫義夫節婦等項見行事
例先據有司具奏到部仍行有司覆勘回文至日復行
彼處風憲衙門覈實取具結狀到部案候類奏旌表中
間多有六七十歲以上年已衰邁而文移勘覆動經數
年寵光未沐已先朝露蓋有抱節操行終身不獲表異
之榮者臣等看得旌表節孝事例實為朝廷激勵風俗
之盛典所以必行再三覆勘者恐有偽為無非欲考其

實耳然至於文移輾轉動淹歲月吏緣為奸恩不下究亦不可不為之所也覆奉欽依今後凡民間孝子順孫義夫節婦等項但係有司勘實具奏者免其覆勘徑行風憲官覈實若風憲官覈實具奏者免其再覈候每季終類奏旌表一次

凡節婦等項必係撫按衙門保奏方與覆題旌表其司府州縣衛所舉奏者俱咨都察院行彼處撫按衙門覈勘取結回部方與類題其已經奏過應該旌表者付精

膳司類給勘合行各該原籍官司照例給與無碍官銀三十兩令本家自行起蓋牌坊除已故不優免外見在者仍照例優免二丁侍養身終之日子孫仍舊當差

類表節孝

正德八年二月山東巡按御史張璿奏山東賊所過州縣有子救父婦衛夫而死者凡百有十九人宜皆旌表禮部議以人多費廣宜準山西例於所在旌善亭側立石碑二各聯書姓名籍貫併疏其孝義貞烈大畧於下

仍官給殯殮費他凡被賊處有奏至者皆如例行詔下
所司

類表貞烈

正德十年二月旌表定遠居民方淳妻丁氏等俱不受
賊汚而死有司具實以聞禮部議定遠兵燹之餘公私
匱竭立坊於門恐人衆不能遍及宜如近例刻石於旌
善亭以彰貞烈人給銀三兩以助殮葬詔可

旌孝

定旌表孝行例

洪武二十七年青州府日照縣民江伯兒以母病割脇肉食之不愈乃禱於岱嶽祠誓云母病愈則殺子以祀神既而母病愈竟殺其三歲子以祭有司以聞上怒曰父子天倫至重禮父為長子三年服今百姓無知賊殺其子絕滅倫理宜亟捕治之勿使傷壞風化遂逮伯兒杖一百謫戍海南因命禮部定議旌表孝行事例行於天下禮部議曰人子之事其親居則致其敬養則致其

樂有疾則託之良醫投之以善藥至於呼天告神斯又
懇切之至此為人子所當然也卧冰割股前古無聞雖
出後世亦是間見至若割肝殘害尤甚且如父母止有
一子割肝剖股或至喪生卧冰或至凍死使父母無依
宗祀永絕反為不孝之大者原其所自皆愚昧之徒務
為說異以驚世駭俗希求旌表以規避徭役割股不已
至於割肝割肝不已至於殺子違道傷生莫此為甚自
今人子遇父母有疾醫治弗愈無所控訴不得已而割

朕卧冰亦聽其所為但不在旌表之例詔從之

宣德元年六月旌表孝子權謹等孝行上諭行在禮部
尚書胡濙曰孝者人道當然賢智之人不待勸勉中人
以下須激勵乃能為善旌表之意正如此若權謹則朕
所知謹實人也宜旌之使人人見而思奮其於治道
豈不有益

例外旌獎

嘉靖三十年二月諫巡撫宣府右僉都御史劉闕直隸

巡按御史胡宗憲各題稱開平衛軍人萬國正因母董氏病危割肝救療母愈身亡乞要旌表本部查有會典不許旌表前例難以題請移咨都察院轉行該管衙門徑自以禮表異優恤

例外不准旌表

宣德元年五月行在禮部奏錦衣衛總旗衡整女母病篤剗肝煮液飲之而痊宜旌表上曰為孝有道孔子曰身體髮膚受之父母不敢毀傷剗腹剗肝此豈是孝若

致殺身其罪尤大況太祖皇帝已有禁令今若旌表使
愚人效之豈不大壞風俗女子無知不必加罪所奏不
允

旌節

守節未旌而沒

弘治十六年十一月掌國子監事禮部右侍郎謝鐸奏
臣祖母趙氏守節四十餘年未蒙旌表而歿請以本身
應得誥命移為旌表之恩禮部覆奏上曰趙氏准與旌

表鐸應得誥命仍給之

貞節已故追旌

弘治十七年旌表直隸太倉州民顧鉞妻俞氏貞節舊制節婦已故者不與旌表之列中書舍人顧守元奏臣父鉞棄背時母俞氏年僅二十四歲遺腹有臣甫及三月臣既生復嬰險疾每見臣疾勢危迫輒欲自縊保護成立又教誨之臣竊科第以有今日皆母氏力也有司舉臣母守節艱苦之狀禮部行勘得實例當旌表類奏

之際臣母不幸卒於官邸禮部拘例不為覆奏使臣母
一生苦節泯滅無聞實為可憫伏乞一體旌表則臣母
雖死猶生而臣之志願亦永畢矣禮部覆奏許之

姑婦同旌

成化二十一年十二月福建武平縣奏本縣民王宗安
妻鍾一娘夫亡守節年已八十有九其子英妻鍾妙賢
亦守節三十八年禮部奏一娘已老恐以例覆勘而先
婦死終不能沾恩乞先旌之妙賢則仍待覈實上以姑

婦一節可嘉命俱旌之不必覆勘

表四節之門

成化二十三年二月桐城縣陶氏有婦三世四人夫亡皆守節無二志有司以事聞上曰朝廷旌表節義所以激勵風俗然通都大邑有司僅舉一二雖所遺者多而亦可見全節之難也今陶氏一家之內三世四婦相繼守節蓋有所視法而然誠天下所罕有者其即旌表為四節之門不必如例覆勘

旌未嫁節

宣德元年九月監察御史尹崇高奏諸暨縣孟氏女蘊
許嫁縣學生員蔣文勗未嫁文勗充貢入監為御史病
卒蘊年纔二十號哭歸蔣氏執喪三年甘守苦節年已
六十乞旌表其門上謂行在禮部臣曰夫死婦守節世
恒有之此女但許嫁能執婦禮守志不二可謂貞女人
所難能者宜旌表以勵風化

例外旌獎

嘉靖二十九年十二月詎浙江東陽縣知縣鄭綺奏稱
本縣民人趙惟機妻郭氏事姑至孝乞要旌表本部查
無旌表孝婦事例移咨都察院轉行巡按衙門許有司
量行旌表以勵風化

命婦表貞烈例

隆慶二年旌表山西石州生員喬芝母蘇氏及其女車
同軌妻喬氏為貞烈之門蘇氏者副使喬應光妻也隆
慶元年九月十三日北兵攻陷州城蘇氏義不受辱攜

其女喬氏入井其同居王氏等十人亦相繼赴井死事
聞禮部言蘇氏雖業已受封而貞烈異常又能率居民
等同時殉節宜一體旌表詔從之

禮教備考

鄉飲酒禮

申明鄉飲酒禁

弘治元年國子監生張裕言天下有司行鄉飲酒禮齒
德不稱者或濫與賓席有齒德者或終身不與况酒食

太豐非敦本化俗之意乞命所司禁止禮部會議宜申明禁約上如議

舉行鄉飲酒

洪武五年詔天下舉行鄉飲酒禮上以海內宴安思化民俗以復於古乃詔有司舉行鄉飲於是禮部奏取儀禮及唐宋之制又采周官屬讀法之旨參定其儀在內應天府及直隸府州縣每歲孟春正月孟冬十月有司與學官率士大夫之老者行之於學校在外行省所屬

府州縣亦皆取法於京師其民間里社以百家為一會
糧長或里長主之百人內以年最長者為正賓餘以齒
序坐每季行之於里中大率皆本於正齒位之說而賓
興賢能春秋習射亦可通行焉所用酒有毋至奢靡若
讀律令則以刑部所編申明戒諭書兼讀之其武職衙
門在內各衛親軍指揮使司及指揮使司凡鎮守軍官
每月朔日亦以大都督府所編戒諭書率僚佐讀之如
此則衆皆知所做而不犯法矣制曰可

附考

邱濬曰按先儒謂鄉飲有四一則三年賓興賢能二則

鄉大夫飲國中賢者三則州長習射四則黨正蜡祭

黨正

國索鬼神而祭祀則以禮屬民而飲酒於序以正齒位

今世所行惟存一鄉大夫

飲國中賢者耳

又按鄉飲之名始於成周漢唐以來亦間行之然無定制我太祖御製大誥有云鄉飲酒禮叙長幼論賢良別姦頑異罪人其坐席間年高有德者居於上年高淳篤

者並之以次序齒而列其有曾違條犯法者列於外坐
不許干于善良之席主者若不分別致使貴賤混淆察
知或坐中人發覺主者坐以違制奸頑不繇其主紊亂
正席全家移出化外大哉王言其垂世警俗之意深矣
謹按秦漢而下行此禮者一見於東平永平之郡學
再見於晉武太和之辟雍三見於唐貞觀之鄉校

習射

申明生員習射

正統二年江西樂安縣教諭鄭顥奏舊制生員學書習射皆有成規蓋欲文事武備不可偏廢近年以來專習文辭不嫻書射有負作養上命行在禮部申明舊制行之

德政備考

恤養

給育孳生

永樂元年禮部言鄱陽縣民張公受妻徐氏一產三男

宜循舊制賜鈔十錠米五石其所產子令兩家無子者
代育每家月給米五斗事故罷給從之禮部又言直隸
上海縣許安孫妻沈氏一產三男命循例優給

京城恤養

成化二年十二月禮部尚書姚夔等言今京城街市多
有疲癯殘疾之人扶老攜幼呻吟悲號非徒足以干天
地之和而四夷朝使見之亦將為其所議乞勅五城御
史拘審其有家者責令收管無家者收養上曰無問老

小男女有家無家及外來者順天府盡數收入養濟院
記名養贍無令失所

恤療

惠民藥局

永樂四年十二月上與侍臣語知京師之人多有疾不
能醫藥者歎曰內貯藥材廣而不能濟人於闕門之外
徒貯何為命太醫院如方製藥或為湯液或丸或膏隨
病所宜用於京城內外散施仍訪朝臣中有通於醫者

俾分任其事又曰朕一衣一食不忘下人之艱猶於咫尺不能有濟何況遠外遂命禮部申明惠民藥局之令必有實局勿徒為文具而已

振刷惠民藥局

嘉靖二十一年禮部左侍郎孫承恩上言邇者盛夏炎鬱散為疾厲都城內外之民僵仆相繼臣考之周禮醫師之屬有疾醫以掌萬民之疾病凡以惠元元重民命也乞命太醫院及順天府惠民藥局依按方術預備藥

餌於都門居民輻輳之處招諭散給庶貼危貧困之人
得以有濟雖有厲氣不為灾矣上曰頃聞疫氣流行民
多札瘥朕甚憫焉其令太醫院差官順天府措置藥物
設法給惠上親檢方書製為濟疫小飲子方頒下所司
遵用濟民仍命禮部刊行

推廣給藥

上遣官施藥於朝天宮畢諭禮部曰朕祇承玄祐仰體
生德命官施藥濟民昨侍郎孫承恩等奏邊方軍民亦

宜拯濟況今疲於征伐之後豈免疾灾茲一體施濟即遣錦衣衛千戶同道錄司官一員齎赴宣大山西等處會同撫按官立法給散俾務均霑玄惠以廣同仁之義遣官施藥治療

嘉靖三十八年上諭禮部近因春冷人多生疾令太醫院依方修藥隨病治療差官同錦衣衛官於九門分布給散立夏日止

掩骼

瘞流骸

宣德元年五月陝西淳化縣丞吳整言自京師通州至河南兩岸多漂流骸骨乞官為瘞之上諭行在禮部尚書呂震曰文王仁及枯骨丞所言當從之其即施行勿緩

建言給山地為義塚

正統十三年浙江左布政使孫原貞言杭州嘉興等府在城軍民多無祖塋凡有物故悉從火化棄骨水中非其故違法律良由山地各有業主故雖孝子慈孫亦莫

能盡其安葬之心考之前代有漏澤園義塚之設乞勅
該部會議行文各府縣查勘官民山地置立義塚繚以
垣墻令彼悉得安厝免致暴棄事下禮部議之

閹禁

逮杖自宮

成化十年十一月辛未有自宮者三百一十四人先已
奉旨謫戍皆逃至京師復希進用禮部以聞上曰錦衣
衛其逮至重杖而訊之今後似此輩者所司無得擅收

具奏仍嚴加禁約錦衣衛官奏執自宮者五十四人命
枷項於禮部前併各大市街示衆前此自宮者甚衆日
赴禮部喧訴求進尚書鄒幹等以為言有旨錦衣衛執
之已而皆逃匿五十四人者猶喧訴不已因執以聞乃
有是命

嚴行禁處自宮

成化十一年禮部奏近有不逞之徒往往自宮及其弟
男子姪以希進用聚至四五百人告乞奏收羣衆闕然

阻遏無計奏入有旨此輩逆天悖理自絕其類且又羣聚喧擾宜治以重罪但遇赦宥錦衣衛執而杖之人五十仍押送戶部如例編發海戶當差是後有再犯者本身處死全家發邊遠充軍禮部仍移文天下禁約

成化二十二年禮部以自宮求進者累有處斬事例而往往不遵雖發充軍為民到彼即逃近復千百成羣在部告擾乞行禁處上謂此輩相效成風不畏明憲命巡城御史同錦衣衛坐城官嚴督五城兵馬司官并其所

主之家俱逮送錦衣衛自宮者痛杖五十不分新舊充軍為民悉逋原籍還家仍令所司羈管毋容外出所主之家法司議罪以聞

自宮希用王府

弘治三年正月襄陽之隣境頻年旱荒民有自宮者王俊等十六人襄王見淑奏乞畱府應用禮部言俊等故違禁例長史不能諫王請并治以罪命逮問俊等罪訖仍發原籍為民長史姑宥之

查奪閹人濫賞

正德元年禮部以大學士劉健等言南海子閹人選入千餘蟒龍玉帶之賞太濫覆議謂私閹累有禁例其潛住京城者宜力加斥逐蟒衣玉帶之濫賞者請命司禮監查究追奪上是之私閹令通查舊例申明禁約而嚴治其敢犯者

禮部志稿卷六十五

欽定四庫全書

禮部志稿卷六十六

明 俞汝楫 編

臣禮備考

辨儀等

官儀尚左

吳元年十月丙午命百官禮儀俱尚左改右相國為左相國左相國為右相國餘官如之

給事御史爭坐次

景泰元年給事中李侃與御史朱瑄同事會坐侃坐瑄左十三道監察御史陳述等連章劾侃六科給事中李實等又奏欲坐御史左命禮部會官議尚書胡濙等言先奉宣宗皇帝聖旨御史給事中照品級坐從之已久給事中張讓等奏近因御史朱瑄給事李侃爭論坐次命廷臣會議議者言六科十三道俱係朝廷近侍風憲官今後在內則先近而後遠給事坐御史左在外則先

正而後從御史坐給事左奏藁已成都察院左都御史
陳鎰獨不肯署務令改議臣竊惟六科十三道係朝廷
近侍風憲官言責所係國家治否所關今上皇播遷未
返天象垂戒方嚴百姓流移四時旱澇苗蠶猖獗黠猾
凶頑為臣子者自宜同心協力以弘濟為心獻忠効謀
以宗社為事其朱瑄李侃所奏已付之廷議自有公論
為御史者當俟聖斷奈何於先啟爭端之朱瑄則回護
不言後辨曲直之李侃則痛加參奏同惡相濟假公營

私鑑叨總臺憲自當推原理法之重大彰無我之公却
乃阻抑近侍扶制多官會議罪實在鑑并御史陳述等
俱當明正其罪帝曰今多事之時為臣者正當同心協
力護國保民御史給事中俱近侍官乃常以私忿攪擾
朝廷禮部其會官議以聞尚書胡濙言已奉聖斷只依
品級序坐今張讓所奏無容別議從之

內閣近侍官班次

景泰二年戶部尚書兼翰林院學士陳循奏內閣係掌

制誥機密重務衙門近侍之職莫先於此永樂初年本
閣官員凡遇聖上視朝立在金臺東錦衣衛在西後因
不便移下貼御道東西對立已為定例近日因兩衙門
官俱上奉天門奏事五府官雖品高皆立西簷柱外獨
六卿序立東簷柱內遂使內閣官無地可立此係朝廷
不可不辨者昔孔子在宗廟朝廷一便言誠以禮法所
在政事所出之處不可不明辨也又臣等叨蒙皇上擢
任同知經筵事會講之日班或列於六卿之下恐識者

笑玷辱此職自臣等始也又每午朝進近御榻奏事臣所奏俱係制誥機密重務不宜在五府六部奏雜事後孔子曰君子無所爭必也射乎古人大射之禮尚且如此況於聖明禮樂文物之朝內閣經筵神明制作之所可以苟乎下禮部議覆詔常朝內閣學士與錦衣衛官東西對立經筵日同知經筵官序於尚書都御史上午朝翰林院先奏事

官員拜禮

洪武二十年冬十月重訂官員拜禮其一凡朝見稽首
頓首五拜乃臣下見君上之禮先稽首頓首四拜後一
拜叩頭成禮稽首四拜者百官見東宮親王之禮其見
父母亦四拜其餘官長親戚朋友相見止許行兩拜禮

申飭官儀違越

隆慶四年都察院左都御史葛守禮等言我朝設官分
職品制截然具在乃人情務於好上法制廢於因循沿
至於今遂成陵替官名九品混若一途綱紀紊矣輦轂

之下奢僭無節法守亂矣監司守令體統倒置士庶倣效悖逆成俗矣臣以為宜申明禮制自朝儀始嚴令大小臣工各安名分守禮節以綱紀四方敢有違越者許各衙門長官并臣等及該科參究吏部仍察訪別處挽回陵替之風章下禮部請申明禁約從之

公侯伯駙馬朝參

弘治十五年舊例公侯伯駙馬朝參不置門籍至是黜朝而無籍可稽錦衣衛請置門籍英國公張懋等奏勲

戚大臣自祖宗定朝儀以來皆與文武品官事體不同
宜如舊禮部覆奏命公侯伯駙馬朝參如舊不許逸情

南京官儀二議

嘉靖十六年南京禮部尚書霍韜言元旦冬至萬壽聖
節臣下拜賀皆行十二拜禮惟南京行八拜禮不宜獨
簡出制帛文武百官俱吉服騎導於郭門之外拱立路
隅帛過乃退而一歲兩送或失之煩乞一歲一行六科
遇部院三品以上大臣引馬遜避臣前具奏奉有明旨

而抗違不遵如故殊失大小相臨之禮疏下禮部覆言
三大節在京有宣表致詞及傳制俱舞蹈山呼行十二
拜禮導送郊外至日止行八拜禮此祖宗舊制非臣下
敢自為隆殺似難輕改其送制帛儀雖無舊典無非敬
事郊廟之儀每年二次舉行無容別議且六科遇部院
大臣引馬避遜既有明旨自當遵守得旨慶賀制帛禮
儀俱照舊六科道路遜避照在京一體遵行

定部院謁見禮

嘉靖四十四年以部爭禮儀奏令禮部會同禮科詳議
部院謁見禮儀以聞禮部尚書高儀等覆奏憲臺職司
綱紀其威儀體貌係百僚具瞻不當因人隆殺選郎雖
居要路然品秩班行亦六曹儔侶豈宜獨示優崇祇緣
事權所在莫敢誰何故節年禮儀遞相引重甚至大臣
仰揖司官訛以傳訛非所以一體統而崇遜讓也自今
考滿官見都察院一如見部禮以杜紛爭其九卿翰林
等官由吏部後門者亦不得遍揖四司報可

勲胄乘輜禁例

嘉靖三十六年禮部題該給事中黎良題稱伏觀孝宗皇帝欽准條例內一款在京堂上文職四品以下及五府管事在京在外鎮守守備等項公侯伯都督等官不分老少俱不許乘輜違者參問其餘軍職若上馬拏交床出入抬小輜者先將服役之人問罪指揮以下參問京衛調外衛外衛調邊衛俱帶俸差操欽此近見在京公侯等官乘輜者多亦不知何所據依而倡為此風也

臣又疑英國公張懋在先朝亦常乘轎蓋聞先朝任其
才而優其老亦人惟求舊杖於鄉杖於國之意耳乃出
於一時之特恩要不可援以為例也夫何近年以來無
分老少不辨公侯厭馬弗乘乘轎相競其罪有不可逭
焉者伏望陛下俯賜綸音責令乘轎公侯伯等官從實
具奏回話務見朝廷曾否錫予法制有無違碍如果故
違憲章擅作威福各加法制其有隱情不行具奏認罪
者許科道官備訪指名劾奏仍勅禮部再行申明舊例

以後公侯伯等官如有仍前違制乘轎者見任者革去管事帶俸者量減俸米各永不推用等因題奉聖旨這本說的是今後兩京五府及在外鎮守守備等項公侯伯都督等官皇親駙馬在京四品以下文職在外除巡撫都御史其都布按三司以下官員俱不許乘轎兵部尚書下營之日也只許乘馬其餘軍職不許上馬拏交床出入乘小轎但有違的在內聽科道在外聽巡按御史糾劾從重罰治應參問降調的照例行該衙門知道

定班行

駙馬班次

洪武三年命定駙馬都尉班次禮部奏按宋制駙馬班次出入皆依官品今駙馬官職當依百官由西門出入其班次品級當在百官之上如一品在一品之上二品在二品之上從之

朝參官員坐次

洪武十六年詔定朝參官員坐次凡奉天門賜坐公侯

至都督僉事坐於門內守衛指揮坐於都督僉事之後
稍南六部尚書及署都督府事官坐於門外皆東西相
向六部侍郎十衛指揮應天府尹國子祭酒翰林院官
僉都御史坐於西角門內若華蓋殿則公侯及都督僉
事坐於殿內尚書及署都督府事官坐於鹿頂內皆東
西相向六部侍郎及十衛指揮應天府尹國子祭酒翰
林院官諫官僉都御史坐於鹿頂外東西相向

侍班官員

洪武二十三年詔更定侍班官員禮部奏定今後文武
官除分詣文華殿啟事外凡遇陞殿各用禮鞋照依品
級侍班如有違越失儀者從監察御史儀禮司糾劾東
班則六部堂上官各司部掌印官都察院堂上官十三
道掌印御史通政使司大理寺太常寺應天府正佐官
翰林院侍讀侍講學士修撰編修春坊學士光祿寺欽
天監正佐官尚寶司太醫院官五軍斷事官及京縣正
佐官西班則五軍都督及首領官錦衣衛指揮各衛掌

印指揮給事中中書舍人

三司奏本序次

天順七年七月福建三司官以賊情事聞其奏本先布按二司後都司上謂都察院官曰三司品有定制今失序如此其行事可知其禁約各處三司奏本序次悉如品級若都布二司有犯該按察司覈之者送巡按御史鞠問違者重罪之

南京會議坐次

成化五年閏二月禮部右侍郎葉盛言在京法司凡遇審錄俱於承天門東西分為四行列坐公侯駙馬伯東班前行都督等官後行尚書都御史侍郎等官西班牙前行通政司大理寺佐貳官并六科掌科給事中後行及禮部會議民情俱於闕左門東直房中序坐尚書左右都御史等官坐於上侍郎副都御史等坐於下通政司參議大理寺寺丞等官東傍六科掌科都給事中西傍俱有次序南京乞如北京坐次從之

南京公侯班首

嘉靖三十四年八月該南京魏國公徐鵬舉撫寧侯朱岳因習儀互爭班首訐奏該本部尚書王賓覆看得徐鵬舉朱岳一則以革任未革爵又有奉祀之命謂公當先於侯一則以守備南京坐府掌事欲以侯而先乎公臣等謂照朝廷班序以爵之大小為先後而事權非所論故守備之任可以公亦可以侯而班爵之制公為先侯次之魏國公徐鵬舉以元勲世臣爵列上公雖因言

官論列奉旨革任緣有奉祀之命爵祿固存非若文臣
罷間遂不得有列於朝之比撫寧侯朱岳守備南京事權
為重然慶賀祝願臣子同情天威在上不違咫尺固未
有朝廷之上可以不於其爵而於事權者又況徐鵬舉
原係欽定班首先後之間亦自較然惟是二臣以世勲
大臣之貴當廣衆森嚴之地互相忿爭大失體統鴻臚
寺鳴贊閤曲序班王汝徵職掌朝儀不能據禮糾正反
為阿曲均屬有罪合候命下移咨南京禮部行令今後

一應習儀序班致詞稱賀俱以徐鵬舉為首表賀僉名
朱岳先之伏乞天語嚴加儆戒俾各安分守毋得妄爭
其鳴贊闔曲序班王汝徵似應量加罰治以儆其餘奉
聖旨是着徐鵬舉充班首官今後不許妄爭闔曲王汝
徵各罰俸一個月欽此

申飭南京公聚儀節

嘉靖十五年南京禮部尚書霍韜言禮儀定式京官三
品以上乘轎官員相遇迴避有等制甚明也邇者南京

文武官無論品秩崇卑皆用肩輿或乘女轎街衢相遇卑不避尊舊年給事中曾鈞騎馬徑衝尚書劉龍藩珍兩轎之間鈞尋與龍互相訐奏臣禮官也乞申明禮制俾臣有所遵守詔下禮部都察院會者以聞時禮科都給事中李充濁等給事中謝廷蒞等及南京給事中曹邁等各抗章謂近侍之臣不當迴避又雜舉公會案次得與尚書同列以證之章俱下所司既而韜謂禮部尚書夏言指使充濁言引避不與議左都御史王廷相乃與

禮部侍郎黃宗明張璧議覆曰臣等按大明會典京官常朝儀條內公侯序於文武班首次駙馬次伯一品以下文東武西依次序立其班列之定體如此又大宴儀條內云公侯駙馬伯文職四品以上及學士陞殿東西侍坐六科都給事中中左門序坐六科給事中丹墀東西坐其宴之定體如此又公聚序坐條內云在京法司會官審囚俱於承天門外東西兩行列位公侯駙馬伯列於東班督府等官列於西班通政司大理寺佐貳官

并六科給事中列於西班後行禮部會議民情俱於闕
左門東直房序次尚書左右都御史等官上坐侍郎副
都御史對坐通政司參議大理寺寺丞等官列於東旁
六科都給事中列西旁南京文武衙門公事會集聚坐
亦如之其會議序坐之定體如此又官員相遇迴避條
內云七品遇四品以上引馬迴避五品引馬側立遇六
品趨右讓道而行其迴避之定體如此又觀給事中教
場比試與五府侯伯大臣并坐選官賜酒飯與吏部尚

書對坐與兵部尚書侍郎並坐此皆會典之所不載夫
尚書侍郎一也在吏部則對坐在兵部則並坐亦非定
體矣但與大臣一時同事禮體之變又如此必欲從變
推類衡決常禮亦所不可今六科給事中朝參宴會遵
常達變咸循理制其途遇九卿大臣亦皆引馬迴避成
規具在其南京六科給事中途遇九卿大臣立馬拱手
不知所始禮典既不該載事例亦無可查且皇明一王
之制萬國同文豈以南北殊俗異政兩京文職四品以

下不許乘轎已有定制其用蔽幃女轎出入皆違犯典章所宜禁止請勅南京諸臣四品以下遵制乘馬毋得輒用肩輿其六科途遇部院大臣亦如在京引馬遜避違者聽禮部都察院及科道糾正上從其議仍詔已後有故犯者必參治其罪

明職守

太常用儒臣

正統八年翰林侍講劉球言十事內一款曰選禮臣以

隆祀典今之太常即古之秩宗必得清慎習禮儒臣為之然後可交於神明故舜命伯夷以惟清意正在此今太常卿與少卿俱缺久無儒雅之臣考禮正儀於其間祀享寧無未虔禮度寧無少乖宜選用諸儒臣為之庶祀典克修命部院大臣集議覆球所言惟太常寺官當從之

分別司寺職掌

嘉靖十一年七月內禮部題該鴻臚寺卿王道中等題

為申舊例請宸斷以便遵守事又該通政使陳經等題
為明職掌以正體統事奉聖旨該部一併看了來說欽
此通抄到部查得大明會典開載通政司職掌一款本
司官職專出納帝命通達下情關防諸司出入公文奏
報四方臣民實封建言陳情伸訴及軍情聲息災異等
事又一款凡天下臣民實封入遞或人齎到司須於公
廳眼同開拆仔細檢看事干軍情機密調撥軍馬及外夷
來降進貢方物急缺官員提問軍職有司官員并請旨

定奪事務卽於底簿內謄寫畧節緣繇當將原來實封御前陳奏畢就於奏本後批寫旨意送該科給事中收轉該衙門抄出施行其進繳稅糧文冊勘合通關起解軍囚等項附簿明白止送該科收不須入奏又一款凡在京大小衙門但係奏出不分公事私事并在外鎮守等項內陳情已事巡撫都御史巡按等項御史總兵副參及分守守備備倭等項武職宣慰宣撫招討等司及府州縣等衙門一應錢糧軍馬刑名乞恩認罪繳勅等

項本冊俱赴本司投進又查得鴻臚寺職掌一款凡謝
恩見辭官員人等先於本寺報名該見辭及領勅繳勅
或賜酒飯者預先日具本題知次日早俱於午門外行
禮畢本寺官仍引赴御前叩頭又一款凡公差給繇官
吏將文冊投下明日引入又一款凡王府并鎮守守備
備倭等官外夷宣慰宣撫招討等司進貢賫本人員天
下諸司朝覲給繇官員并奏繳軍職文憑稽考公文完
銷勘合及總兵等官會奏聲息等項本冊俱赴本寺引

奏又一款凡在外總兵等官奏報捷音本寺官引差來人於御前宣奏又一款凡復命朝見人員繳勅進題本及四夷朝貢人員進番字文書俱本寺官接至西陞授內官捧進及查得嘉靖十一年正月該鴻臚寺卿王道中題為朝儀事仰惟聖體違和暫免朝參數日即今早臻勿藥獲遂康寧視朝之初誠恐面見面辭人員旬日所積會於一旦未免起數大多累動綸音久勞聖體合無以後凡遇免朝之日一應面見面辭官員午門外行

禮該繳勅者本寺官員引領進繳其復命當引等項人員各令具本奏知庶幾聖明視朝之初起數減少不至於過勞等因奉聖旨是欽此臣等看得我朝分建百司以釐庶務而於章奏之復送案牒之往來又該通政司以總之紀其時日而考其出入名為喉舌之司以防壅隔之弊也至於鴻臚寺之職止於整肅朝儀傳宣制命引領進奏人員於各衙門文案奏疏全不相干其各處王府及在外大小衙門差來進貢賫本人員及朝覲給

繇官吏并在京在外復命謝恩赴任等項人員例諛面進見辭者先期赴本寺報名本寺即將朝見緣繇具本題知次日皇上御朝之時本寺官次第引見其間或有繳勅領勅封進圖本及外夷番字文書者俱從本寺官當御前引奏接遞進呈非如通政司之實封可以開拆公文必須編號也其職掌之詳載在會典條目甚明但近來在外官員人等多有不明司寺職掌徑將實封本冊赴該寺投遞該寺亦或間與封進相承日久因以為

例非舊制也合無今後除在京衙門題本係有印信及
官吏連名僉署者俱遵照舊規於左順門徑自投進外
其餘一應職行奏本并在外衙門題奏等本俱從通政
司投遞類封進覽其面辭面見人員應該繳勅領勅投
遞圖本文書者俱從該寺先期題知臨朝引入面奏進
呈不得擅將本冊收受封進仍進前項同寺職掌通行
天下王府及大小衙門知會以便遵守再照得鴻臚寺
先因聖體違和視朝之時誠恐起數太多有勞宣命題

稱今後凡遇免朝一應面見面辭官員應該領勅繳勅者俱於左順門領繳復命等項人員俱從本寺具本奏知此蓋一時權宜之策耳今遂沿以為例凡遇免朝即謂不須陛見徑將勅書領繳非祖宗之制也況今皇上勵精圖治視朝臨政鮮有暇日正宜延見羣臣以宣德意其領勅在外公幹事完回還人員正宜面奉天顏親進奏疏以通下情所據前事相應遵復照常舉行合無今後應諛面見面辭及領繳勅復命等項人員雖遇皇

上暫時免朝仍候視朝之日於奉天門奏見庶使中外臣工皆知尊君之禮而於祖宗立法防範壅隔之意益嚴矣奉聖旨免朝日期領勅繳勅等項不係重大事情照該寺題准事例行其餘依擬欽此

受賞賜

定頒賜受賜禮

洪武三年九月上諭禮臣近頒賜之禮失序今後當以所賜物先置奉天門內引人入見聽宣諭後給若物在

後與貢獻何異

洪武八年二月重定頒賜及迎接詔告儀凡朝官受賜於御前跪受衣則服以拜賜皆五拜禮在官受賜者初四拜既受賜復四拜

止賞賜辭免虛文

嘉靖十一年十一月內禮部題諛巡按貴州監察御史周禪奏為欽蒙恩賞乞容辭免事

云云

等因本部看得

御史周禪奏要辭免賞賜一節固見本官處心廉讓不

敢自有其功之意但查有前項勞績已經兵部議擬題
奏欽依給賞乃係國家彝典似難准辭再照近來各處
受賞官員不以誠體陛下褒功至意往往循習故事輒
具疏辭免煩瀆天聽且差人賫進往返道路糜費供億
非惟辭涉不情抑且有乖大體合無通行各該地方撫
按等官除有誤恩濫及應該辭免者自合照例辭外其
餘有功人員既經覈實該部題奏欽依禮所當受者今
後止許具本稱謝毋得輒復辭免以示虛文違者許禮

科參究其今次御史周禕辭免賞賜合無行令祇領惟復聽其辭免奉聖旨周禕已賞了不准辭近來受賞官員往往具辭委的煩擾依擬行各該地方撫按等官今後有功人員該賞的止許具本稱謝不必辭擾欽此

儀從

武官公使人數

洪武三十年上以武官多私役軍卒踰法制命禮部考定其從人額數於是禮部議指揮及同知六人僉事及

千百戶衛所鎮撫四人皆於正軍伍內取用輪番更直
每三日一易下直則歸隊伍操練凡衛所直廳六人守
門二人守監四人守庫一人止選老軍充役每月一更
直

洪武三年十二月詔定公侯儀從禮部尚書陶凱等考
定以唐宋之制為準於是賜功臣魏國公徐達以下儀
從各有差

洪武十年八月壬申定官員儀從及公使人數初丞相

大都督准侯例儀從用十五人從一品十三人正從二品九人三品七人四品五人五品四人六品四人七品三人八品九品二人至是議自從五品以上仍前例六品至九品比前例各減一人其各司聽差公使人數中書省御史臺各二十六人六部各十人斷事司察院各八人應天府十五人上元江寧二縣各十人

洪武十三年三月癸巳詔以京衛軍士充公侯儀仗戶韓國公李善長魏國公徐達皆二十戶曹國公李文忠

等皆十九戶侯皆十五戶先是以京民充之近因善長以老疾辭儀從故命易以軍士仍給之

凡官員鞍轡馬領下纓并鞅轡俱黑色不得用紅纓及描金嵌金天青硃紅裝飾公侯及一品二品銀鍍鐵事件描銀鞵三品至五品銀鍍鐵事件油畫鞵六品至九品擺錫事件油畫鞵一軍民用鐵事件黑綠油鞵

凡官員傘蓋不得用金繡硃紅裝飾公侯及一品二品銀葫蘆頂黑色茶褐羅表青絹裏三簷雨傘油絹三品

四品黑葫蘆頂餘同二品五品黑葫蘆頂青羅表青絹
裏兩簷雨傘油絹六品至九品黑葫蘆頂青絹表青絹
裏兩簷雨傘油紙軍民不得用羅絹涼傘止用油紙雨
傘

在朝公卿大臣乘安車肩輿景泰間在京文職官自三
品以上乘肩輿正統後因太監汪直奏革部覆得旨如
景泰時行弘治間河南等道監察御史奏禁約八人擡
部議兩京及在外文武官員應乘轎者乘轎應乘馬者

不得乘轎得旨八人轎嚴加禁約

官司備考

公儀

郡縣禮生儀從

洪武二十年定罷縣禮生及儀從人先是命郡縣籍民充儀從及選民生資質祥雅者為禮生遇迎詔赦進賀表箋及春秋祭祀則令贊禮供事而郡縣富民夤緣有司假此為名影蔽差役或因以為姦至是事聞命罷

之遇迎接詔赦之類以儒學生員贊禮畢仍令肄業儀從則以弓兵皂隸之徒為之

都布二司慶賀序秩

洪武十五年廣東布政司使請於禮部曰本司秩從二品都指揮使司正二品正旦等節慶賀行禮請定著衙門禮部以聞上命行禮宜於布政司班列則以秩為序

軍衛與有司行禮

永樂元年壬申巡按福建監察御史周新言朝廷設立

軍民諸司彼此頡頏兩非統屬今福建都司所轄各衛官每府官過衛門或道路相遇怒府官不下馬甚至鞭辱僕隸及各衛千戶所遇有公務不申本衛徑令有司理辦少或不從輒訶責吏典有乖治體請自今府官以公事至衛者行正道平禮相見道途相遇分道而行遇聖節正旦冬至衛官悉於府治行禮其千戶所遇有公務不許徑移文府縣亦不許凌辱有司官吏又開讀詔書乃各布政司職掌既已差人於各府開讀衛所官一

同行禮而都司又差人下衛所開讀科斂軍士筵宴餽送擾衆非一請今以後開讀詔書除附近府縣衛所一同行禮外抄謄遵守其邊海衛所亦從布政司差人開讀為宜上悉從之命禮部行諸司遵守

慶祝拜禮

宣德四年八月直隸安慶府潛山縣知縣俞益言洪武初凡遇正旦等節在外大小衙門慶賀禮儀俱行舞蹈山呼十四拜禮後來惟五品以上衙門進表之日行此

禮至節日止於露臺上設香案告天祝壽行九拜禮固是定制緣五品以下不進表者尚多亦止行九拜禮臣下之心皆有未安宜仍舊行舞蹈山呼十四拜禮庶展臣子至敬之心從之

到任祭牲數

宣德七年直隸廬州府英山縣知縣賀完奏洪武中定新官到任儀注凡新官到任父老人等導引入城遍謁神祠如儀致祭其儀物皆出於官若山川城隍等神俱

用二牲其餘忠臣烈士用一牲今在外各衙門新官到任有用二牲遍謁祭告者有用二牲於城隍廟設壇總祭者其禮不一宜有定規命行在禮部議令羊豕各一總祀應祀神祇於城隍祠從之

憲司與衛進表行禮

正統六年山東濟南衛指揮同知鄧鑑奏按察司與衛俱三品衙門舊例行文平關正統初年以來按察司始割付各衛經歷司比者山東按察司進表之日令衛官

赴司隨班行禮有違洪武禮制乞勅該部申明舊例行
文平關進表行禮各於本衙門為當上命禮部議尚書
胡濙等言各衛與按察司平關未可從其進表行禮宜
各於本衙門從之

京衛赴京行禮

景泰六年南京守備平江伯陳豫言江北和陽六衛統
隸督府凡拜表慶賀一切禮儀例應赴京行禮但諸衛
分守江外所寄甚重一遇時節傾城官屬盡數渡江或

值風濤甚至旬日不能還衛城池管鑰委付無所實非所宜禮部言六衛雖為京衛實為外衛無別關防不可不嚴且遠隔江濤往復不便今後請但令各衛長官一人及首領官一人入京行禮餘悉畱衛治事從之

致仕與有司班次

成化十一年正月國子監祭酒周洪謨言時節行禮宜令致仕官與有司官依品高下序列班次事下所司議禮部覆奏所言致仕與見任同乞通行天下遵守及受

封官亦與致仕者同

官民相見揖拜禮

洪武五年三月辛亥命重定官民相見禮先是元俗官僚相見跪一足為禮拜則叩首既拜復跪一足屬官下人見上司官長即引手於後退却若避之然上甚厭之至是復定為儀凡內外諸官每旦會公堂肅揖就坐幕官先揖長官退就幕署其屬官見上官必序立堂陞之上躬揖上官隨坐隨立拱手答禮幕官答拜如初見及

以事出而還見上官再拜見幕官亦然上官拱手幕官
答拜品秩等者互揖凡內外掾吏令史書吏宣使奏差
人等晨謁長官階下一揖長官不答幕官拱手如節序
及公參或差遣辭見俱兩拜長官不答幕官答凡典吏
見幕官亦序立階下肅揖幕官不答如時節公參差遣
辭見兩拜幕官拱手凡子孫於祖父母每旦肅揖若遠
出旬日及節序慶賀皆四拜餘尊長亦然若尊長之疎
遠出旬日及節序慶賀兩拜

都御史與御史體式

弘治十七年十月巡撫遼東都御史張鼎言臣竊惟都御史之於御史名器不無上下之別今巡按御史余濂批語皆以上臨下之詞且臣若果恣意變法濂自當指實劾奏豈可不顧名分有失大體乞將臣放歸田里仍命大臣及科道官辨別是非復斟酌巡撫巡按公會禮儀及移文體式通行遵守上下其章於刑部仍命與禮兵二部議濂亦上疏自辨以為臣所謂不許擅變成法

者乃為都司衛所而言。竊因臣劾奏，乃拊撫他詞，欲致誣害。且巡撫巡按事有關涉行令所司轉達，亦事體因襲之舊。於是禮兵刑三部議今後巡撫巡按公會文移，宜各遵禮制。都察院正坐御史，傍坐都御史劄付御史。御史則具呈都御史，或有各屬相關事情，應轉行者，則抄案轉行。其有事干軍馬糧餉彼此相關，仍行知會。

申明一城衙門共開讀

景泰六年十一月，參贊延綏軍務大理寺少卿曹璉言：

舊制凡朝廷頒降詔勅各衙門通行迎接於大衙門開
讀以次衙門謄黃遵奉今往往不遵此例各別差人賁
捧一城之內至開讀至五七次者且如綏德一城有鎮
守衙門官有衛有州而州所部衙門復無慮五六既賁
至鎮守等官處矣復頒之於衛衛又頒之於州州又徧
頒於所部非惟煩褻不敬抑且賁來人使往來重疊供
給饋送不勝其擾乞勅所司申明舊制重行禁約從之

榜令

申明亭書罪犯

洪武十五年上諭禮部臣曰天下郡邑申明亭本以書記犯罪者姓名照示鄉里以勸善懲惡使有所儆戒今有司槩以百姓雜犯小罪書之使良善一時過誤者為終身之累雖欲改過自新其路無由爾禮部詳議來言於是禮部上自今犯十惡奸盜詐偽干名犯義有傷風俗及犯贖至徒者書於亭以示懲戒其餘雖雜公私過誤非干風化者一切除之以開良民自新之路其自私

毀亭舍除所懸法令及塗沒姓名者監察御史按察司官以時按視罪如律制可

旌善申明二亭紀錄

洪武十七年壬寅命禮部錄有司官善政著聞者揭於其鄉之旌善亭刑部錄內外諸司官之犯法罪狀明著者揭於申明亭以示勸戒

振飭申明旌善亭

正統三年戶部廣西司主事張清言洪武間設立申明

旌善二亭所以勸懲善惡也近年有司視為文具廢弛不舉將何以示勸懲廣西樂平府知府唐復亦以為言行在禮部會議宜行天下府州縣修葺二亭復置板榜於內如有為善為惡之人備寫事跡揭於亭以勵風俗上命有司行之

禮部志稿卷六十六